



Broj: 01-50-1-54-63/05  
Sarajevo, 30. augusta 2005.

## **ZAPISNIK**

63. sjednice Predstavničkog doma  
Parlamentarne skupštine Bosne i Hercegovine,  
održane 27. jula i 30. augusta 2005. godine

Šezdesetteća sjednica održana je u dva dijela – 27. jula i 30. augusta 2005.

Prvi dio sjednice (27. jula) počeo je u 10,30 sati. Prisustvovalo je 37 poslanika. Opravdano su odsustvovali: Miloš Jovanović, Izet Hadžić, Abdulah Nakaš, Nijaz Duraković i Jozo Križanović.

Iz Vijeća ministara BiH jednom dijelu sjednice prisustvovali su predsjedavajući Adnan Terzić i ministri Ljerka Marić i Dragan Doko.

Sjednicu su pratili Jelena Despot i Sanja Stanojević - OHR, Kristjan Haupt – OSCE i T. Rois i Nada Dedić – austrijska ambasada.

U kratkim uvodnim napomenama predsjedavajući Šefik Džaferović upoznao je poslanike o tome da je iz prijedloga dnevnog reda isključena Platforma o sigurnosno-obavještajnoj politici zato što nadležna komisija nije završila razmatranje u komisijskoj fazi. Također je upoznao poslanike da je oko 13 sati predviđena pauza u kojoj će članovi Kolegija održati pres-konferenciju, jer će 08. augusta 2005. godine funkciju predsjedavajućeg Predstavničkog doma preuzeti Nikola Špirić, prvi zamjenik predsjedavajućeg.

Samo je Adem Huskić dao prijedlog za dopunu dnevnog reda – da se uvrsti zaključak u vezi sa stanjem u privredi.

Prijedlog Adema Huskića usvojen je sa 27 glasova za i sedam protiv.

Predsjedavajući Doma konstatirao je da 63.sjednica ima sljedeći

## **DNEVNI RED**

1. Usvajanje Zapisnika 62. sjednice Predstavničkog doma,
2. Poslanička pitanja i odgovori,
3. Zahtjev Vijeća ministara BiH za razmatranje Prijedloga zakona o izmjenama i dopunama Izbornog zakona BiH po hitnom postupku, u skladu s članom 105. Poslovnika,
4. Prijedlog zakona o osnovama sigurnosti saobraćaja na putevima u BiH (drugo čitanje),
5. Davanje prethodne saglasnosti za imenovanje zamjenika generalnog revizora finansijskog poslovanja institucija BiH,
6. Izvještaj o izvršenju Budžeta institucija BiH i međunarodnih obaveza BiH za 2004. godinu,
7. Informacija o rezultatima primjene Zakona o dopunama Zakona o carinskoj tarifi Bosne i Hercegovine,

8. Analiza rezultata odluka Vijeća ministara BiH o privremenoj obustavi primjene nulte carinske stope po Ugovoru o slobodnoj trgovini između Bosne i Hercegovine i Republike Hrvatske, odnosno Sporazumu o slobodnoj trgovini između Bosne i Hercegovine i Srbije i Crne Gore,
9. Kratka analiza vanjskotrgovinske razmjene Bosne i Hercegovine – Stanje trgovinskog deficita BiH i mjere za njegovo smanjenje,
10. Prijedlog mjera za ublažavanje posljedica povećanja cijena osnovnih životnih namirnica usljed uvođenja PDV-a (materijal je podijeljen na 9. zajedničkoj sjednici oba doma),
11. Informacija o inicijativi za razmatranje mogućnosti uvođenja sistema pasivne registracije birača u Bosni i Hercegovini i saradnja s Direkcijom CIPS projekta,
12. Informacija Vijeća ministara BiH o izdavanju pasoša i registarskih tablica,
13. Davanje saglasnosti za ratifikaciju Konvencije o tripartitnim konsultacijama u svrhu promoviranja implementacije međunarodnih standarda rada, 1976.
14. Prijedlog zaključka (predlagač: poslanik Adem Huskić).

#### **Ad – 1:** Usvajanje Zapisnika 62. sjednice Predstavničkog doma

O Zapisniku nije bilo rasprave. Usvojen je s 30 glasova za i jednim suzdržanim.

#### **Ad – 2:** Poslanička pitanja i odgovori

Predsjedavajući je konstatirao da su odgovore do održavanja ove sjednice dobili Jozo Križanović i Momčilo Novaković.

Odgovor je komentirao Momčilo Novaković.

Postavljena su nova pitanja poslanika kako slijedi:

#### **Dušanka Majkić:**

"Molim nadležno ministarstvo da mi dostavi odgovor na sljedeća pitanja:

1. Da li postoji precizna evidencija svih putnih isprava koje su proizvedene i isporučene BiH?
2. Da li je tačno da je određen broj putnih isprava (po instrukcijama Ministarstva civilnih poslova) isporučen direktno DKP mreži?
3. Nisu li ovakvi propisi u radu ovog ministarstva razlog što je vizni režim za BiH toliko strog?"

#### **Adem Huskić:**

1. "Pitam Predsjedništvo BiH i Vijeće ministara BiH – da li gradnja mosta na Pelješcu ugrožava interese Bosne i Hercegovine u pogledu pristupa otvorenom moru? Ako je odgovor potvrđan, na koji način namjeravaju zaštititi interese Bosne i Hercegovine?"

2. Postavljam pitanje Ministarstvu sigurnosti – Zašto se dešava da nakon povratka u našu zemlju studenti, kao i specijalizirani akademski kadar ne mogu imati priliku i mogućnost zaposlenja na poslovima za koje su školovani (obrazloženje u prilogu)?"

#### **Ljiljana Milićević:**

«Da li će i kada, tj. na koji način poslanici u Predstavničkom domu biti upoznati s mogućim trasama i rješenjima Jadransko-jonske ceste i Koridora Vc.

#### **Filip Andrić:**

"Na sjednici Doma 14. juna postavio sam pitanje, odnosno dao inicijativu našoj Komsiji za ljudska prava vezano za premlaćivanje zatvorenika u KPZ Zenica..."

Znam da je Komisija jučer imala na dnevnom redu Izvještaj o posjeti tom zatvoru. Zanima me zašto mi nisu dostavili odgovor?"

**Vinko Zorić:**

"Mediji su objavili da se iz Biblioteke u Bugojnu izbacuju autori hrvatske i srpske nacionalnosti. Ako je to tačno, da li je to učinjeno zbog toga što su djela tih autora loša ili zbog nacionalnosti autora?"

**Ad – 3:** Zahtjev Vijeća ministara BiH za razmatranje Prijedloga zakona o izmjenama i dopunama Izbornog zakona BiH po hitnom postupku, u skladu s članom 105. Poslovnika

Bez rasprave Dom je, sa 26 glasova za i četiri suzdržana, usvojio zahtjev predlagača za hitni postupak.

Također bez rasprave, usvojen je jednoglasno Zakon o izmjenama i dopunama Izbornog zakona BiH.

**Ad – 4:** Prijedlog zakona o osnovama sigurnosti saobraćaja na putevima u BiH (drugo čitanje)

U uvodnim napomenama, uz ostalo, predsjedavajući Džaferović podsjetio je na proceduru provedenu o Prijedlogu zakona i na amandmane podnesene u plenarnoj fazi.

O Prijedlogu zakona i na ovoj sjednici vođena je duža rasprava u kojoj su učestvovali: Filip Andrić, Momčilo Novaković, Mirsad Ćeman, Dušanka Majkić, Adem Huskić, Ruža Sopta, Sead Avdić, Beriz Belkić, Martin Raguž, Selim Bešlagić, Milorad Živković, Ljiljana Milićević, Muhamed Moranjkić, Tihomir Gligorić, Vinko Zorić, Marija Perkanović, Ivo Lozančić, Nenad Mišić i Petar Kunić.

U raspravi su neki članovi Komisije istaknuli da nisu dosljedno navedeni određeni amandmani onako kako su na Komisiji usvojeni. Zbog toga je Kolegij zadužio nadležnu komisiju da u pauzi (koju je ranije tražio Klub poslanika HDZ-Demokršćani) održi sjednicu i razjasni iznesene nejasnoće, te Domu o tome dostavi izvještaj.

Poslije pauze Komisija za saobraćaj i komunikacije dostavila je Izvještaj kojim je, usvajanjem tri nova amandmana, dopunila raniji izvještaj.

Na kraju, Dom je zaključio da se za narednu sjednicu odgodi izjašnjavanje o Prijedlogu zakona u drugom čitanju, da je rasprava zaključena i da poslanici imaju pravo reagirati samo na tri nova amandmana u posljednjem izvještaju Komisije.

**Ad – 5:** Davanje prethodne saglasnosti za imenovanje zamjenika generalnog revizora finansijskog poslovanja institucija BiH

Povodom Odluke Predsjedništva BiH diskutirali su: Nikola Špirić, Zlatko Lagumdžija, Tihomir Gligorić, Vinko Zorić, Momčilo Novaković, Šefik Džaferović, Sead Avdić, Mirsad Ćeman i Beriz Belkić.

U raspravi je izneseno neslaganje što je Predsjedništvo BiH ignoriralo zaključke Doma u vezi s mandatom glavnog revizora i, uz ostalo, naglašeno da nisu u pitanju imena predložena za zamjenike revizora, o kojima se čak nije ni raspravljalo. Na kraju, Dom je usvojio sljedeći

**Z A K L J U Č A K**

Predstavnički dom Parlamentarne skupštine BiH konstatira da nisu ispunjeni uslovi za davanje prethodne saglasnosti na Odluku Predsjedništva BiH o utvrđivanju prijedloga kandidata za zamjenike generalnog revizora finansijskog poslovanja institucija BiH, dok se ne ispoštuju raniji zaključci Doma.

Za zaključak je glasalo 30, suzdržala su se dva poslanika.

**Ad – 6:** Izvještaj o izvršenju Budžeta institucija BiH i međunarodnih obaveza BiH za 2004.

Ministar finansija i trezora BiH Ljerka Marić podnijela je obrazloženje Izvještaja o izvršenju Budžeta.

U raspravi o ovoj tački učestvovali su: Zlatko Lagumdžija, Beriz Belkić, Muhamed Moranjkić, Tihomir Gligorić, Momčilo Novaković, a poslije rasprave na pitanja je odgovorila ministrica Ljerka Marić.

Sa 24 glasa za, dva protiv i dva suzdržana usvojen je Izvještaj o izvršenju Budžeta institucija BiH i međunarodnih obaveza BiH za 2004.

**Ad - 7:** Informacija o rezultatima primjene Zakona o dopunama Zakona o carinskoj tarifi Bosne i Hercegovine

Petar Kunić obrazložio je Izvještaj Komisije za vanjsku trgovinu i carine.

U ime podnosioca Informacije govorio je ministar Dragan Doko.

Predsjedavajući Vijeća ministara BiH Adnan Terzić komentirao je zaključke nadležne komisije Doma.

U raspravi su učestvovali: Dušanka Majkić, Momčilo Novaković, Seada Palavrić, Petar Kunić, Beriz Belkić, Zlatko Lagumdžija – predložio konkretne zaključke u šest tačaka, predsjedavajući Vijeća ministara BiH Adnan Terzić, Sead Avdić, Muhamed Moranjkić, Hazim Felić i Selim Bešlagić.

Nakon duže rasprave Dom je usvojio sljedeće

### **ZAKLJUČKE**

**1. Usvaja se Informacija Vijeća ministara BiH o rezultatima primjene Zakona o dopunama Zakona o carinskoj tarifi Bosne i Hercegovine.**

**2. Usvaja se Izvještaj Komisije za vanjsku trgovinu i carine, podnesen Domu povodom Informacije iz tačke 1. Zaključaka.**

**3. Zadužuje se Vijeće ministara BiH da se u roku od 15 dana detaljno, dokumentirano i precizno izjasni o Izvještaju i po stavkama, te da na osnovu njega Komisija ispita navode koji su ostali bez adekvatnog odgovora, o čemu će do kraja augusta obavijestiti Dom.**

**4. Zadužuje se Uprava za indirektno oporezivanje da provjeri sve transakcije i poslovanje po osnovu ovog zakona, te da dostavi preciznu, jasnu i detaljnu informaciju o firmama koje su poslovale po ovom zakonu, o količinama robe, finansijskim transakcijama i vremenu.**

Zaključak pod brojem 1 usvojen je s 19 glasova za, sedam protiv i pet suzdržanih.

Zaključak pod brojem 2 usvojen je s 16 glasova za, osam protiv i sedam suzdržanih.

Za Zaključak pod brojem 3 glasalo 15, protiv 12, suzdržana četiri, a Zaključak pod brojem 4 usvojen je sa 27 glasova za i tri suzdržana i njih je u raspravi predložio Zlatko Lagumdžija.

Dva prijedloga zaključaka Zlatka Lagumdžije nisu dobila entitetsku većinu, i to Zaključak br. 2 «Izvještaj se upućuje državnom tužiocu da se o njemu izjasni, i sa stanovišta eventualnog kršenja Zakona o državnim institucijama, i firmi koje su zloupotrijebile odluku» i br. 5 - «Parlament će nastaviti s radom sutra i raditi, i u komisijama i plenarno, bez odlaska na godišnji odmor i obavezuje Vijeće ministara BiH da postupi na isti način do rješavanja ključnih pitanja sa 63. sjednice Doma».

Nisu usvojeni zaključci br. 4 – «Zadužuje se Vijeće ministara BiH da pripremi program saniranja štete, ukoliko ona postoji, firmama primarnim proizvođačima koje je ovaj zakon oštetio» i br. 6 – «Obustavlja se daljnja primjena ovog zakona dok se ne daju odgovori po danas usvojenim zaključcima».

**Ad – 8:** Analiza rezultata odluka Vijeća ministara BiH o privremenoj obustavi primjene nulte carinske stope po Ugovoru o slobodnoj trgovini između Bosne i Hercegovine i Republike Hrvatske, odnosno Sporazumu o slobodnoj trgovini između Bosne i Hercegovine i Srbije i Crne Gore

Nakon uvodnih napomena predsjedavajućeg Doma, predsjedavajući Komisije za vanjsku trgovinu i carine Petar Kunić ukratko je obrazložio Izvještaj te komisije.

U ime Vijeća ministara BiH o Analizi su govorili predsjedavajući Adnan Terzić i ministar Dragan Doko.

U raspravi su učestvovali: Zlatko Lagumdžija, Petar Kunić, Dušanka Majkić, Beriz Belkić, Sead Avdić, Momčilo Novaković, Ljiljana Milićević, kao i ministar Dragan Doko.

Nakon rasprave, predsjedavajući Džaferović iznio je prijedlog dva zaključka:

1. Analiza se prima k znanju i zadužuje se Vijeće ministara BiH da periodično obavještava Parlament o stanju u ovoj oblasti i
2. Preporučuje se entitetskim vladama da se pozitivni efekti ovih mjera usmjere u podsticaj poljoprivredne proizvodnje.

Prvi zaključak nije dobio entitetsku većinu – za je glasalo 14 ( FBiH 9, RS 5), protiv 11, suzdržala su se dva poslanika.

Drugi zaključak nije usvojen – za je glasalo 10, protiv 10, suzdržala su se četiri poslanika.

Zatim je predsjedavajući, na prijedlog Beriza Belkića, na glasanje dao Izvještaj Komisije za vanjsku trgovinu i carine o Analizi.

Izvještaj Komisije usvojen je sa 17 glasova za (FBiH 12, RS 5), devet protiv i jednim suzdržanim.

Sjednica je u ovom dijelu prekinuta i usvojen zaključak da Kolegij odredi termin održavanja nastavka.

Prvi dio sjednice završen je u 20,00 sati.

**Nastavak 63.** sjednice održan je 30. augusta 2005. godine, s početkom u 10,00 sati. Prisustvovalo je 37 poslanika. Opravdano su odsustvovali: Abdulah Nakaš, Mehmed Suljkanović, Ivo Lozančić, Petar Kunić i Mirko Blagojević.

Sjednici su prisustvovali predsjedavajući Vijeća ministara BiH Adnan Terzić i ministar Safet Halilović, kao i predstavnici Izborne komisije BiH Branko Petrić, Lidija Korać i Vehid Šehić.

Iz međunarodnih organizacija prisustvovali su Jelena Despot i Sanja Stanojević – OHR, Mirsad Žiga – Ambasada SAD i Loredana Pasku – Ambasada Rumunije u BiH.

Sjednica je nastavljena na 9. tački dnevnog reda.

**Ad. – 9:** Kratka analiza spoljnotrgovinske razmjene Bosne i Hercegovine – Stanje trgovinskog deficita Bosne i Hercegovine i mjere za njegovo smanjenje

Poslije uvodnih napomena koje je o materijalu dao predsjedavajući Doma Nikola Špirić, u diskusiji su učestvovali: Beriz Belkić, Dušanka Majkić, Sead Avdić, Jozo Križanović, Muhamed Moranjić, Zlatko Lagumdžija, Šefik Džaferović i Nikola Špirić.

Po završetku diskusije, predsjedavajući Špirić, slijedeći predlog nadležne komisije i predloge iz rasprave, na glasanje je dao sljedeće

### ZAKLJUČAK

1. Predstavnički dom Parlamentarne skupštine BiH nije prihvatio Analizu vanjskotrgovinske razmjene - Stanje trgovinskog deficita BiH i mjere za njegovo smanjenje i Analizu vraća Vijeću ministara BiH.

2. Poziva se Vijeće ministara BiH da izradi akcioni plan koji će sadržavati prijedlog mjera, nosioce aktivnosti i rokove za njihovo izvršavanje, s posebnim osvrtom na plan urgentnih mjera u oblastima u kojima ih je moguće izvršiti odmah.

Zaključak je usvojen s 29 glasova za i pet suzdržanih.

**Ad – 10:** Prijedlog mjera za ublažavanje posljedica povećanja cijena osnovnih životnih namirnica usljed uvođenja PDV-a

Odmah nakon otvaranja ove tačke intervenirala je predsjedavajuća Komisije za finansije i budžet Ljiljana Milićević, rekavši, uz ostalo, da je u junu poslanicima dostavljen materijal koji je Komisija razmatrala na sjednici održanoj 26. jula i o tom materijalu Domu je dostavila Izvještaj. Međutim, na prvom dijelu 63. sjednice, 27. jula, Vijeće ministara BiH je poslanicima dostavilo inovirani materijal o kojem Komisija nije dala mišljenje. Naglasila je da se osjećala obaveznom skrenuti pažnju na ovo, a stvar je Doma kako će se prema materijalu odnositi.

U ime Vijeća ministara BiH uvodno izlaganje o Prijedlogu mjera podnio je predsjedavajući Adnan Terzić, kada je izvršena i vizuelna prezentacija Prijedloga mjera.

U raspravi su učestvovali: Milorad Živković, Mladen Potočnik, Sead Avdić, Tihomir Gligorić, Jozo Križanović, Zlatko Lagumdžija, Dušanka Majkić, Beriz Belkić, Azra Hadžiahmetović, Ljiljana Milićević, Seada Palavrić, Selim Bešlić, Muhamed Moranjkić i Izet Hadžić. Na određena pitanja iz rasprave, u ime podnosioca materijala, odgovorio je Zlatko Hurtić.

Nakon rasprave usvojeni su sljedeći

### Z A K L J U Č C I

**1. Prima se k znanju Prijedlog mjera za ublažavanje posljedica povećanja cijena osnovnih životnih namirnica usljed uvođenja poreza na dodatu vrijednost.**

**2. Preporučuje se entitetskim vladama da Prijedlog mjera iskoriste kao polaznu osnovu za izradu socijalnih programa.**

**3. Predstavnički dom Parlamentarne skupštine BiH zahtijeva od Vijeća ministara BiH da do kraja septembra 2005. donese i objasni sistem distribucije novca namijenjenog socijalnougroženim građanima Bosne i Hercegovine.**

Zaključci pod brojevima 1 i 2 usvojeni su na prijedlog predsjedavajućeg i nadležne komisije, s 22 glasa za ( FBiH 14, RS 8), dva protiv i sedam suzdržanih.

Zaključak pod 3. tačkom predložio je Mladen Potočnik i usvojen je s 23 glasa za (FBiH 18, RS 5), a osam poslanika suzdržalo se od glasanja.

Nije usvojen prijedlog zaključka Zlatka Lagumdžije – da se zaduži Vijeće ministara BiH da do naredne sjednice podnese Prijedlog zakona o izmjenama i dopunama Zakona o PDV-u i Prijedlog zakona o izmjenama i dopunama Zakona o akcizama po hitnom postupku, u skladu s članom 105. Poslovnika, u skladu s verzijama osnovnih zakona usvojenih krajem 2004., po kojima se određene robe i usluge (osnovne životne namirnice, lijekovi, knjige, novine, učila) oslobađaju poreza (nulta stopa) i uvode dodatne akcize na luksuznu robu.

Za ovaj prijedlog zaključka glasalo je 14 (FBiH 9, RS 5), protiv 15, suzdržala su se četiri poslanika.

**Ad – 11:** Informacija o inicijativi za razmatranje mogućnosti uvođenja sistema pasivne registracije birača u Bosni i Hercegovini i saradnja s Direkcijom CIPS projekta

Predsjedavajući Špirić dao je uvodne napomene u vezi s Informacijom naglašavajući da je Izborna komisija BiH predložila Domu usvajanje konkretnih zaključaka ako prihvati inicijativu Izborne komisije BiH.

U raspravi su učestvovali: Miloš Jovanović, Šefik Džaferović, Elmir Jahić, Muhamed Moranjkić i Beriz Belkić.

Nakon rasprave, Dom je jednoglasno usvojio sljedeće

## ZAKLJUČKE

1. Prihvata se inicijativa Izborne komisije BiH za razmatranje mogućnosti uvođenja sistema pasivne registracije birača u Bosni i Hercegovini.
2. Zadužuje se Vijeće ministara BiH da, preko Ministarstva civilnih poslova BiH i Direkcije za implemenaciju CIPS projekta, u saradnji s Izbornom komisijom BiH, utvrdi odgovarajuće tehničko rješenje i pristupi izradi idejnog projekta sistema pasivne registracije.
3. Zadužuje se Radna grupa za izmjene Izbornog zakona BiH da, na osnovu predloženog tehničkog rješenja, utvrdi prijedlog odgovarajućih zakonskih rješenja koja će regulirati sistem pasivne registracije birača u Bosni i Hercegovini.
4. Obavezuje se Vijeće ministara BiH da, nakon utvrđivanja liste projektnih zahtjeva i izrade idejnog projekta pasivne registracije, pruži podršku u daljnjoj realizaciji projekta i osigura potrebna finansijska sredstva za implementaciju sistema pasivne registracije.

### **Ad – 12:** Informacija Vijeća ministara BiH o izdavanju pasoša i registarskih tablica

O ovoj tački nije bilo rasprave.

Informacija Vijeća ministara BiH primljena je k znanju.

### **Ad – 13:** Davanje saglasnosti za ratifikaciju Konvencije o tripartitnim konsultacijama u svrhu promoviranja implementacije međunarodnih standarda rada, 1976.

Dom je bez rasprave dao saglasnost za ratifikaciju Konvencije iz ove tačke.

### **Ad – 14:** Prijedlog zaključka (predlagač: poslanik Adem Huskić).

Kratko je diskutirao Vinko Zorić, rekavši da nije realno tražiti da se informacija dostavi do naredne sjednice kad je to već sutra. Na ovu intervenciju izmijenjen je prijedlog zaključka tako da je zatraženo da se informacija dostavi do 65. sjednice.

Dom je, prema tome, na prijedlog Adema Huskića, s 25 glasova za i jednim suzdržanim, usvojio zaključak koji glasi:

**Predstavnički dom Parlamentarne skupštine BiH traži od Vijeća ministara BiH da do 65. sjednice pripremi informaciju o stanju u privredi, s posebnim osvrtom na stanje poljoprivredne proizvodnje u Bosni i Hercegovini.**

Ovim je realiziran dnevni red 63. sjednice.

Sastavni dio Zapisnika je transkript 63. sjednice Doma.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**dr. Nikola Špirić**